



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

27. Kalenderwoche – ab 2. Juli 2011

Widze schdadd Schbridze

Mir ham in dor Kabaredd-Kisde e neies Brogramm - das dud so heeßn: Widze schdadd Schbridze!
Da duds also um Gesundheit, Gesundheitswesn un- Unwesn gehn. Am Anfang dun mir vorkindn,
dass alle, die da sin, eene Schbridze geeschn de Hamsdordollwuhd grischn solln. Regdahl! Ja, alle!
Ooch die, die kee Hamsdor sin! Isch meene, isch hab mir ja ooch eene Schbridze geeschn
Schweinegribbe gähm lassn. Du mussd ja selbor kee Schwein sein. Es is jednfalls nisch Bedingung!
Un ooch bei Hamsdordollwuhd is das so. Du mussd kee Hamsdor sein! De Schbridze is ja ooch
mähr geeschn Dollwuhd nisch geeschn Hamsdor! Wie bei Zigeunorschnidzl... - da duds ja ooch
nisch geeschn Zigeunor gehn!

Off dor annorn Seide isses abor durschau meeschlich, dass wennsde de Hamsdordollwuhd grischn
dusd, dass de dann so Simdohme hasd, als wie wenn de e Hamsdor bisd - Hängebaggn, Schnurbard,
Schdummlschwänzchn... - nee, isch meschde solsche Simdohme nisch ham!

So gesähn, sinn also Schbridzn durschau wischdisch un rischdisch! Ohne Imbfung däde de
Menscheid villeischd längsd ausgeschdorm sein! Odor mir dädn alle Hamsdor sein!

Abor besser als Schbridze is ehm, wenn de gahr nisch erschd krank wern dusd. Un da sinn nu in de
ledzdn Jahre immor mähr so aldornadiefe Medhoden in Mode gekomm. De glassische
Schulmedeziehn wird immor mähr vordrängeld! Da duds zum Beischbiehl die ganze Homobahdie
gähm. So mid Bachbliedn un Feng-Schui! Fasd ganz ohne Schemie! Un de Aggubungduhr, die aus
Schiena gekomm is! Un das Gesundbeten, wasse im Faddikahn in Rom gerne machn! Un
nadiherlich - dor ledzde Schrei! - das Gesundschoßn!

Besondorsch de ledzdenannte Medohde dud sich schbezjell bei de Benkor im Finanzsegdor ausbreidn. Die sin middlorweile sowas von gesund... - die wissn schon nisch mähr, wasse anschdelln solln, damid se ooch ma zum Arzd gehn kenn!

Ja, Gesundschoßn is bessor als Umgeschubbd wern!

Odor dann ehm das Lachn! Ja, das Lachn is ooch eene ganz neue Medohde zur Gesundheitsvorsorsche. Es kommd nadiehrlich ooch im Zusammenhang midm Gesundschoßn vor - ... wobei, das Lachn is nisch ganz ohne Risigo. Wennsde disch gesundgeschdoßn hasd, mussde offbassn, dass de disch dann nisch krank- odor kabuddlachn dusd!

Nee, abor so ganz normales Lachn iebor den Bleedsinn, dähn annre vorzabbn dun, das is sähr gesundheidsdienlich! Dor gesamde Kreisloof kommd daderdursch in Schwung! De Bubilln wern massierd, de Bohrn in dor Haud dun sich erweidorn, de Adorn wern elasdich, das Bauchfell wird endgniddord... un ooch de innoren Orgahne - Härz, Niern, Lähbor... un so - wern zu heehoror Leistung schdimmuliert. Ja, Gesundheit dursch Lachn! Brobiern Ses ma aus! Ab Freidaach 8.Juli in dor Kabaredd-Kisde! Weidore Dährmiene - jedes Wochenende bis Ende Augusd!

Eduard Sachsenmeyer